

Društvo za otpremništvo iz stavka 1. ovoga članka dužno je u roku od šest mjeseci od dana stupanja na snagu ovoga zakona podnijeti zahtjev Ministarstvu za evidentiranje ranije licence i uskladiti svoje poslovanje s odredbama ovoga zakona.

#### Članak 16.

Stručni ispiti položeni po propisima o međunarodnom otpremništvu koji su bili na snazi na teritoriju Federacije BiH do dana stupanja na snagu ovoga zakona, a polagani pred komisijom imenovanom od strane nadležnog ministarstva, izjednačeni su sa stručnim ispitom u smislu članka 12. ovoga zakona.

Otpremnik s položenim stručnim ispitom dužan je u roku od tri mjeseca od dana stupanja na snagu ovoga zakona evidentirati ranije uvjerenje u Ministarstvu.

#### Članak 17.

Propise iz članka 6. i članka 12. ovoga zakona ministar će donijeti u roku od tri mjeseca od dana stupanja na snagu ovoga zakona.

#### Članak 18.

Poslovima međunarodnog otpremništva ne mogu se baviti osobe čiji je uži član obitelji zaposlen u carinskoj službi Federacije BiH.

#### Članak 19.

Danom stupanja na snagu ovoga zakona na teritoriju Federacije BiH prestaje primjena Zakona o posebnim uvjetima za obavljanje međunarodne špedicije ("Službeni list RBiH" broj 2/96) i Uredba o posebnim uvjetima za obavljanje poslova međunarodnog otpremništva u svezi carinjenja robe ("Narodni list HZ HB", broj 2/92 i "Narodni list HR HB", broj 20/95).

#### Članak 20.

Ovaj zakon stupa na snagu osmog dana od dana objave u "Službenim novinama Federacije BiH".

|   |   |
|---|---|
| Predsjedatelj<br>Doma naroda<br>Parlamenta Federacije BiH<br>Niko Lozančić, v. r. | Predsjedatelj<br>Zastupničkog doma<br>Parlamenta Federacije BiH<br>Enver Kreso, v. r. |
|---|---|

Na osnovu člana IV. B. 7a) (IV) Ustava Federacije Bosne i Hercegovine, donosim

### UKAZ

#### O PROGLAŠENJU ZAKONA O POSEBNIM UVJETIMA ZA OBAVLJANJE POSLOVA MEĐUNARODNE ŠPEDICIJE U VEZI SA CARINJENJEM ROBE

Proglašava se Zakon o posebnim uvjetima za obavljanje poslova međunarodne špedicije u vezi sa carinjenjem robe koji je donio Parlament Federacije Bosne i Hercegovine na sjednici Predstavničkog doma od 23. maja 2000. godine i na sjednici Doma naroda od 12. septembra 2000. godine.

|  |  |
|--|--|
| Broj 01-549/2000<br>12. oktobra 2000. godine<br>Sarajevo | Predsjednik<br>Federacije BiH<br>prof. dr. Ejup Ganić, s. r. |
|--|--|

### ZAKON

#### O POSEBNIM UVJETIMA ZA OBAVLJANJE POSLOVA MEĐUNARODNE ŠPEDICIJE U VEZI SA CARINJENJEM ROBE

##### I - OPĆE ODREDBE

#### Član 1.

Ovim zakonom propisuju se posebni uvjeti koje mora ispunjavati privredno društvo za obavljanje poslova međunarodne špedicije koji se odnose na zastupanje i obavljanje poslova u vezi sa carinjenjem robe.

#### Član 2.

Poslovima međunarodne špedicije u smislu ovog zakona smatraju se poslovi organiziranja, otpremanja i dopremanja robe

u međunarodnom prometu koje društvo obavlja u svoje ime i za račun nalogodavca (u daljem tekstu: komitenta), u ime i za račun komitenta, odnosno u svoje ime i za svoj račun, kao i obavljanje drugih uobičajenih poslova i radnji u vezi s međunarodnom špedicijom, uz naknadu.

Uslugama zastupanja u međunarodnoj špediciji, u smislu ovog zakona, smatra se: preuzimanje robe u naznačenom mjestu, čuvanje, uskladištenje, utovar, istovar i odnošenje robe, pribavljanje potrebnih uvoznih-izvoznih dokumenata, obrada carinskih i drugih dokumenata, plaćanje carine, taksi i drugih troškova sredstvima komitenta, ukoliko nije drugačije ugovoreno, provjera stanja robe i njene ambalaže, dostavljanje prijevozniku potrebnih podataka za izdavanje prijevoznih papira i dr.

#### II - POSEBNI UVJETI ZA OBAVLJANJE POSLOVA MEĐUNARODNE ŠPEDICIJE

##### Član 3.

Posebni uvjeti koje mora ispunjavati privredno društvo registrirano za obavljanje poslova međunarodne špedicije u vezi sa carinjenjem robe (u daljem tekstu: društvo za špediciju) jesu:

1. da ima odgovarajući poslovni prostor, odnosno prostoriju u vlasništvu, pravo korištenja ili zakupa, koji se nalaze na području carinarnice, odnosno carinske ispostave;
2. da radnici zaposleni na poslovima iz člana 1. ovog zakona moraju imati najmanje IV stepen stručne spreme, položen stručni ispit i da poznaju jedan svjetski jezik;
3. da je osnivač, odnosno većinski vlasnik društva za špediciju državljanin Bosne i Hercegovine;
4. da ima odobrenje - licencu za obavljanje poslova međunarodne špedicije.

##### Član 4.

Radno vrijeme na graničnom prijelazu društvu za špediciju je dužno uskladiti s radnim vremenom nadležne carinarnice, odnosno carinske ispostave.

#### III - ŠPEDITERSKO ODOBRENJE - LICENCA

##### Član 5.

Za obavljanje poslova iz člana 1. ovog zakona društvo za špediciju mora imati odobrenje-licencu (u daljem tekstu: licenca). Licencu izdaje Federalno ministarstvo trgovine (u daljem tekstu: Ministarstvo).

Licencom iz stava 1. ovog člana utvrđuje se da društvo za špediciju ispunjava uvjete za obavljanje poslova međunarodne špedicije propisane ovim zakonom.

##### Član 6.

Zahtjev za izdavanje licence društvo za špediciju podnosi pismeno Ministarstvu i uključuje sljedeće podatke:

1. izvod iz sudskog registra privrednih društava;
2. spisak radnika sa odgovarajućom stručnom spremom i položenim stručnim ispitom;
3. dokaz o vlasništvu, pravu korištenja ili zakupu poslovnog prostora na području carinarnice, odnosno carinske ispostave.

Za izdavanje licence plaća se naknada.

Federalni ministar trgovine (u daljem tekstu: ministar) će propisati iznos naknade iz stava 2. ovog člana.

##### Član 7.

Ministarstvo je dužno u roku od 15 dana od dana podnošenja zahtjeva sa potrebnom dokumentacijom izdati rješenje o licenci.

Licenca se izdaje na neodređeno vrijeme.

Rješenje Ministarstva iz stava 1. ovog člana je konačno u upravnom postupku i protiv njega se ne može izjaviti žalba, ali se može voditi upravni spor.

##### Član 8.

Društvo za špediciju može imati poslovne jedinice, odnosno ispostave.

U svakoj poslovnoj jedinici, odnosno ispostavi mora biti uposlen najmanje jedan radnik koji ispunjava uvjete iz člana 3. tačke 2. ovog zakona.

## Član 9.

Licenca prestaje važiti u sljedećim slučajevima:

- 1) na osnovu obavijesti društva za špediciju o prestanku rada;
- 2) ako se inspeksijskim nadzorom utvrdi da društvo za špediciju ne ispunjava, odnosno da je prestalo ispunjavati uvjete iz člana 3. ovog zakona;
- 3) ako je pravomoćnom odlukom suda izrečena zaštitna mjera zabrane obavljanja poslova međunarodne špedicije zbog povrede carinskih, deviznih ili propisa o spoljnotrgovinskom poslovanju.

U slučajevima iz stava 1. tačka 2. ovog člana rješenje o prestanku važenja licence donosi se ako društvo za špediciju u rješenjem određenom roku ne otkloni utvrđene nepravilnosti i nedostatke.

Licenca prestaje važiti danom određenim u rješenju Ministarstva.

## Član 10.

Rješenje o izdavanju, odnosno prestanku važenja licence objavit će se u "Službenim novinama Federacije BiH" na trošak društva za špediciju.

## Član 11.

Ministarstvo vodi Registar društva za špediciju ( u daljem tekstu: Registar).

U registru se evidentira naziv društva za špediciju, adresa glavnog sjedišta i poslovne jedinice, broj i datum rješenja o izdavanju licence, te podaci u skladu sa članom 6. ovog zakona.

Registar je javan.

## IV - STRUČNI ISPIT

## Član 12.

Stručni ispit za radnike koji obavljaju poslove u vezi sa carinjenjem robe obuhvata: poznavanje carinskih, spoljnotrgovinskih, deviznih i poreznih propisa, Ustava Bosne i Hercegovine i Ustava Federacije Bosne i Hercegovine i upravnog postupka, te poznavanje jednog stranog jezika.

Program, uvjete i način polaganja stručnog ispita, kao i sadržaj i način vođenja Registra lica koja su položila stručni ispit, propisuje ministar po prethodno pribavljenom mišljenju federalnog ministra finansija.

## V - UPRAVNI NADZOR

## Član 13.

Upravni nadzor nad primjenom odredbi ovog zakona i propisa donesenih na osnovu ovog zakona obavlja Ministarstvo i Federalno ministarstvo finansija, svako u okviru svoje nadležnosti.

Inspeksijski nadzor nad primjenom ovog zakona i propisa donesenih na osnovu ovog zakona, te pojedinačnih akata, uvjeta i načina rada špeditera obavljaju: tržišna inspekcija, inspekcija rada i finansijska policija, svako u okviru svoje nadležnosti.

## VI - KAZNENE ODREDBE

## Član 14.

Novčanom kaznom od 1.000,00 KM do 5.000,00 KM kaznit će se za prekršaj društvo za špediciju:

1. ako bez licence obavlja poslove iz člana 1. ovog zakona;
2. ako kod društva za špediciju, poslove u vezi sa carinjenjem robe obavlja radnik koji ne ispunjava uvjete iz člana 3. tačke 2. ovog zakona;
3. ako radno vrijeme ne uskladi sa radnim vremenom nadležne carinarnice u skladu sa članom 4. ovog zakona.

Za prekršaj iz stava 1. ovog člana kaznit će se odgovorno lice u društvu za špediciju novčanom kaznom u iznosu od 200,00 KM do 2.000,00 KM.

Za ponovljene prekršaje iz stava 1. ovog člana može se društvu za špediciju uz novčanu kaznu izreći zaštitna mjera zabrane obavljanja poslova međunarodne špedicije u vezi sa carinjenjem robe u trajanju do pet godina.

O izrečenoj zaštitnoj mjeri iz stava 3. ovog člana obavješavaju se: Ministarstvo, Federalno ministarstvo finansija i Carinska uprava Federacije BiH.

## VII - PRELAZNE I ZAVRŠNE ODREDBE

## Član 15.

Smatra se da, u vrijeme kada ovaj zakon stupa na snagu, društvo za špediciju koje je upisano u Registar špeditera u skladu s ranijim propisima o špediciji posjeduje licencu.

Društvo za špediciju iz stava 1. ovog člana dužno je u roku od šest mjeseci od dana stupanja na snagu ovog zakona podnijeti zahtjev Ministarstvu za evidentiranje ranije licence i uskladiti svoje poslovanje sa odredbama ovog zakona.

## Član 16.

Stručni ispiti položeni po propisima o međunarodnoj špediciji koji su bili na snazi na teritoriji Federacije BiH do dana stupanja na snagu ovog zakona, a polagani pred komisijom imenovanom od nadležnog Ministarstva, izjednačeni su sa stručnim ispitom u smislu člana 12. ovog zakona.

Špediter sa položenim stručnim ispitom dužan je u roku od tri mjeseca od dana stupanja na snagu ovog zakona evidentirati ranije uvjerenje kod Ministarstva.

## Član 17.

Propise iz člana 6. i člana 12. ovog zakona ministar će donijeti u roku od tri mjeseca od dana stupanja na snagu ovog zakona.

## Član 18.

Poslovima međunarodne špedicije ne mogu se baviti lica čiji je uži član porodice zaposlen u carinskoj službi Federacije BiH.

## Član 19.

Danom stupanja na snagu ovog zakona na teritoriji Federacije BiH prestaje primjena Zakona o posebnim uvjetima za obavljanje međunarodne špedicije ( "Službeni list RBiH", broj 2/96) i Uredba o posebnim uvjetima za obavljanje poslova međunarodnog otpremništva u vezi sa carinjenjem robe ("Narodni list HZ HB", broj 2/92 i "Narodni list HR HB", broj 20/95).

## Član 20.

Ovaj zakon stupa na snagu osmog dana od dana objavljivanja u "Službenim novinama Federacije BiH".

Predsjedavajući

Doma naroda

Parlamenta Federacije BiH

Niko Lozančić, s. r.

Predsjedavajući

Predstavničkog doma

Parlamenta Federacije BiH

Enver Kreso, s. r.

368

Na temelju poglavlja IV. odjeljak B. članka 7.a. (IV) Ustava Federacije Bosne i Hercegovine, donosim

## UKAZ

## O PROGLAŠENJU ZAKONA O VETERINARSTVU

Prolašava se Zakon o veterinarstvu koji je donio Parlament Federacije Bosne i Hercegovine na sjednici Zastupničkog doma od 3. listopada 2000. godine i na sjednici Doma naroda od 12. rujna 2000. godine.

Broj 01-566/2000

19. listopada 2000. godine

Sarajevo

Predsjednik

Federacije BiH

prof. dr. Ejup Ganić, v. r.

## ZAKON

## O VETERINARSTVU

## I - TEMELJNE ODREDBE

## Članak 1.

Ovim zakonom uređuje se zaštita zdravlja životinja, veterinarsko-zdravstvena preventiva u prometu i proizvodnji, veterinarska zaštita dobrobiti životinja, organizacija i provođenje veterinarske djelatnosti, naknade i troškovi, nadzor nad provođenjem zakona, kazne i druga pitanja od značaja za organizaciju i funkcioniranje veterinarstva na teritoriju Federacije Bosne i Hercegovine (u daljnjem tekstu: Federacija).